

Waageclique Rhywälle

www.waagecliquerhywaelle.ch

Fasnacht 2017



Basel 1991

Sujet: BREXIT, leen si mi doch usstyyge

E Gospel zem uffwärme:

Let my people go

When Britain was in EU Hand - let my people go
Opressed so hard they could not stand - let my people go
Go down Farage, way down in EU Land
tell Parlament and Co. - let my People go

Good bye EU - BREXIT

Mir Brite glopfe ändgiltig d Fingge,
dr Brüsseler Club, dä duet is stingge.
Mir lehn is nimm vo Brüssel längge,
als Brite wämmer sälber dängge.
Mir nämme dr Notussgang bim Uusegoh,
aber uffbasst - s kennt e Gläuf enstoh.
Was isch so schlimm nimm in dr EU z sy?
Grönland isch jo sit 1985 au nimm derby.

Was änderet bi Brexit

Kai Quale meh mit Europawahle,
kai EU-Bydraag meh miesse zahle.
Nie meh uff das bleede Brüssel fahre,
niemeh unter dr dytscher Fuchtle spaare.
Wieder derfe e 100 Watt Biire yynedrille,
niemeh lyde unter Merkels starkem Wille.
Wieder derfe krummi Guggummere verkaufe,
nie meh in EU gnormte Schueh ummelaufe.
Niemerts quatscht is ständig dry,
mir Brite kenne wieder Single sy.

Was änderet bi Brexit nit

D Brite wärde wyter schaal Bier dringge,
uff dr Insle wird s noh Fish und Chips stingge.
Si wärde wyter mit Porridge dr Maage glaischtere
und mit Melonehuet und Baarebly ummegaischtere.
Si verehere immer no ihr keenigligs Lysi
und wärde bi dr Fuesball-EM nit derby sy.
Si unterziehn sich allewyl Queens Wille,
wärde im Ärmelkanal dr Tunnel uffille.
S kulinarisch Niveau wird bestimmt nit styyge,
doch d Hauptsach isch, si kenne britisch blyybe.

Wirds nomeh Exits gä?

Tschingge glopfe mit Itexit d Fingge,
d Franzose dien mit Frexit wingge.
Mit Grexit draabe d Griechen a,
d Spanier wänn e Spexit ha.
Norwäger sin mit Nexit derby,
bi Schwede kennts den Swexit si.
Irland wird mit Irexit ussträtte,
d Däne dien um Danexit bätte.
Eeschterrych sait mit Oexit servus
und Ungarn isch mit Hunexit duss.
D Frau Merkel stoht uff d Hinterbai,
bald isch si wägem Exit ganz elai.
Mir schaffe das, sait si mit Wuet,
mir sin stur und mir hänn Muet.

Was macht d EU no Brexit

Si brobiere ganz ruehig und sachlich blyybe,
de Brite offeni Usständ unter d Naase ryybe.
Em Räscht vo dr EU dr Gottswille aahängge,
dass si nit ständig an Exit dien dängge.
Dr Blatz vo de Brite dien d Australier ibernäh,
me wird en Ufftritt bim European Songcontest gä.
Dert kenne si ganz gmietlig ihr Liedli winsle,
si reede au änglisch und lääben offeren Insle.
Duet dr Putin no so toobe,
d Ukraine wird no yynegschoobe.

d Schotte und Brexit

D Schotte sin do ganz entsetzt,
was mache mir no Brexit jetzt?
Mir lehn is nit uss dr EU dryybe,
dä Brexit kanis gstohle blyybe.
Solle die doch uss dr EU go,
mir Schotte aber blyybe do.
Wenn is d Brite nimm wänn ha,
denn schliesse mir is den Iren aa.

E Gospel no zem Schluss

Let my people go

When Scotland was in British Hand - let my people go
Opressed so hard they could not stand - let my people go
Go down Sturgeon, way down in British Land,
tell the Queen and Co. - let my People go.

Dää Zeedel het is wie allewyyle d Druggerei Bürgin in Birsfælde druggt.
Häärzlige Dangg.